

## ■ GLOSSA

# Blers salids da las vacanzas...

DA AITA DERMONT-STUPAN

*I*l tschiel è blau dapertut. Almain sin ls cartulinas postalas che vegnan mintga di da porta en. Cuntradas da bellezza, da tut las varts dal mund.

**B**lers salids da las vacanzas...

*T*ar els as repetivan lura puspè las discussiuns: «Nus mai na giain en vacanzas. Guarda, Pinc e Paul van er. Be nus essan anc mai stads davent, anc mai vis il mar.» Er ils uffants vulevan esser stads al mar.

*M*a el, che era da mastregn falegnam, passiuà pestgatur e chatschadur, scheva: «Tge vi jau far al mar! Igl è bain bel avunda qua. Nus pudain ir sin chamonna.» Sin quai vulveva ella ils eglis e suspirava.

*T*ge fascheva el sin chamonna!

*S*tar si a las quatter ed ir a pestga giu la val, brassar peschs per giantar, lura, l'entir suentermiezdi zambergiar en chamonna u enturn chamonna, qua in banchin, là ina curuna. Suenter tschaina anc prender il spejel da

chamonna ed ir a spieular duas, trais uras enfin ch'igl era stgir, turnà en chamonna, caffè cun vinnars. Auters dis era da star si bau-dezzas e trottar cun pic nic suenter el sin in piz.

*N*a, da quai aveva ella avunda. Ella vuleva er ve-sair il muond. Il proxim onn ha ella già baud empustà vacanzas al mar. Per ella e ses dus uffants. «Giai, digrazia, sche vus avais plaschair.» Ella è ida cun els enviers il sid. Igl è stà fitg bel. Ed in onn suenter, puspè. Costa del Sol, Costa Brava.

*I*l terz onn ha ella vulì ir suletta. E cur ch'ella è turnada ha ella gist pachettà anc il rest da sias chaussas ed è ida a star da tschella vart dal vitg. La gliעד scheva: ella ha raschun; cun quest creppun.

*Q*uesta situaziun entira deva ad el bain da morder. E lura anc tschella saira en l'ustaria: Ses vegl consolar, cun il qual el nun aveva fatg auter che sescagnà tut ils onns da scola, era puspè ina giada qua. Discussiun vi e nà.

«... ti, tge vuls ti savair! Ti che es strusch stà ora Cuir!»

«Jau sai quai or dals Atlas.»

*S*in quai aveva tut la runda dà ina risada:

«Atlas! Ozendi ston ins avair vis il mund cun agens eglis sch'ins na vul betg restar tut la vita in clavarun»...

*E*n vardad era l'Atlas il sulet cudesch che l'aveva propi interessà en scola, il sulet ch'el nun aveva bittà davent, anzi, anc mainsvart prendì nanavant per guardar; avant dus onns aveva el cumprà in nov, ina ediziun actuala. E sco quai ch'el enconuscheva sia stretga cuntrada saveva el, a maun da l'Atlas, as imaginar tut las terras dal mund.

*Q*uella notg è el stà anc ditg sur l'Atlas en. E quel atun nun ha el prendì la patente da chatscha. Als nov da settember è'l partì «en vacanzas». El è ì encunter nord. Enfin al mar ed anc sur mar. Turnà pir el november. In onn pli tard in mais pli baud, l'emprim d'avust, es el partì puspè. Ed uschia mintg'on, cur ch'ìls dis chalavan, partiva el per nord e turnava pir per chascha bassa. El nun ha mai tramiss ina cartulina ad insatgi.

*M*a ses uffants al tadlavan uras a raquintar. Cur ch'ìl giuven dad els ha gi ventg onns èn els emigrads tuts trais. Ussa turnan els en Svizra be pli «en vacanzas».